

Atributum, sive corpus Christi species, quod, juxta nos; non minus, quam ille panis consecratus ad edendum communicantibus exhibetur, quamvis invisibiliter, modoque nobis incognito & incomprehensibili. Pronomen autem relativum *ID*, pro ratione contextus materialis subjectæ, æquè referre singulare sive individuum potest, atque universale, ut ita id quod in S. Cœnâ ore corporis manducandum exhibetur, & à communicantibus accipitur & comeditur, bene possit periphrasis esse illius rei in individuo, quæ ad manducandum ore exhibetur, accipitur & comeditur, atque adeò sustinet vim subjecti singularis. Quod si singulare per demonstrativum *HOC* significans exprimi existimus, pro vocula *ID*, ut particulam *HOC* substituas, per me facile licebit. Neque enim syllogismo quicquam, vel quoad sensum præmissarum, vel quoad vim concludendi, decedet, si, illâ in hujus locum substitutâ, cum ita formes: *Hoc quod in S. Cœnâ exhibetur ore corporis manducandum, & à communicantibus accipitur & comeditur, est realiter præsens in S. Cœnâ.* *Hoc quod in S. Cœnâ exhibetur ore corporis manducandum, & à communicantibus accipitur & comeditur, est corpus Christi.* Ergo Corpus Christi est realiter præsens in S. Cœnâ.

XXI. Ita ergo noster syllogismus expositarius, ejusque medium concludendi singulare erit, per voculam *id* vel *hoc*, & periphrasin, ab actibus exhibendi, accipiendi & comedendi petitam, denotatum: & cadet proinde, quod dicebat Vorstius, quod subjectum propositionis minoris ipse Musæus fecerat, est aliquid universale. Cadet etiam, quod dicebat, corpus Christi, cum individuum sit, non posse prædicatum enunciationis esse, sed oportere, ut sit subjectum. Individuum enim, sub suâ ratione propriâ conceptum, prædicari de subjecto singulari, sub aliquâ ratione confusa concepto.